



Yesu Kristu Cimo Cine
Mailo, Ilelo No Muyayaya

na

Rev. William Branham

AMASHIWI YA NTANSI

Ili buku lyalilembwa pakutira onse uwalibelenga engeshiba ukuti Yesu Kristu acili Alepususha no Kuposha abantu.

Kucetekela kwandi ukuti nombala line Ali nokumoneka nakabili.

Ili buku liletweba ifyo Asalile umulumendo umubusu no kumwiita kuli bukapyunga bwakwe, ifyo umulumendo abutwike ukufuma kuli Wene pakashita elyo kabili no mutima wakwe onse apilibukile kuli Wene.

IPEPO

Mwe Tata wa mu Mulu, napapata paleni onse uli no kubelenga ili buku.

Lekeni beshibe ukutula Muli no kwita Ulukuta ulwapulamo nombaline, ulwamusango ulo tushamonapo.

Tucili twalimucetekela Imwe.

Lengeni ukukabila mu mutima onse kabili, Mwe Balungama Imwe, afweni umubomfi wenu uwaicefya ukutwalilila ne mbila Yenu.

Naliishiba Mwalimfishile mu matete, nge fyo Mwacitile Mose pa mulimo umo.

Eico Tata, ngafwilisheni ukucindika ishina lyenu, pantu nalombela ici mwishina lya kwa Yesu.

Ameni.

Yesu Kristu Cimo Cine Mailo, Ilelo No Muyayaya

Nafyalilwe mu Cumberland County, Kentucky, mu kayanda kanono aka fimuti. Batata na bamayo baupene abanono kabili nali umwana uwa bubeli. Balinjebele kuli bamayo ukuti limo ilyo nali nalimo imyeshi mutanda yakufyalwa, kabili batata tabalipo pa ng'anda, twali ketwe ku menshi makasa mu mpili pa nshiku ishingi. Twalibulilwe icakulya na bamayo batendeke ukupwilwa amaka inshita fye yonse. Napakulekelesha baishile tontonkanya ukuti impela naifika. Batile ukuti balilonganike ifyakufwala fyesu fyonse ne fyakulalapo kabili balinsendele mu maboko yabo balifipombele fyonse kuli ifwe pakuti twingasungwa mucikabilila nga kuti cacitwa.

Kuli kabelenga, ndecetekela ukuti ilya nga yali empela nga cakutila Kapususha wesu uwatemwikwa taishile mukumoneka pali ilya nshita. Lelo lyonse fye Aba mupepi kabili alamoneka pa nshita iyalinga. Alandile ku mutemwikwa umukote uwamutima-uwashila umwina mupalamano kabili ali mwebele ukwisa no kumona cinshi tapabelelepo icushi cimo ukufuma ku mupaipi pa nshiku shimo ishinono ishapitilepo. Lintu afikile nokwingila mu kayanda asangile mayo na ine mupepi no kufwa kunsala. Asendele inkuni shimo no kukosho mulilo. Elyo abwekelemo ku kayanda kakwe ukuya tubulilako ifyakulya. Munshita inono twali mu nshila yesu ku maka no bumi nakabili. Ishina Lyakwe lilumbanishiwe pali cilya.

Inshita inono panuma yacilya twalifumine mu musumba wa Kentucky no kukukila ku Indiana. Batata baile mu kubombela umulimi mupepi na Utica, Indiana. Twaikele kulya nalimo umwaka umo kabili elyo twakukile pantanshi

kwisamba ku mipoka poka ya Ohio. Imyaka iingi yalipitile kabili naishile kula ukuba umulumendo uwalinga lintu Lesa alandile kuli ine.

Ubushiku bumo mu cungulo bushiku nali munshila yandi ukutwala amenshi ku ng'anda ukufuma ku butala, ubwabelele nalimo umudada umo ukufuma ku ng'anda. Nalimo pakati ka ng'anda elyo no butala palya palipo icimuti icakale ica poplar. Elyo nafikile fye pa ng'anda ukufuma ku sukulu cilya cungulo bushiku kabili abalumendo bambi abena mupalamano baleya kulya ku cishiba icakale mukuloba. Nalelilila ukukonka lelo batata batile ati nalingile ukuya tapa amenshi. Naliminine mwisamba lya cimuti ku kutusha elyo apo pene fye naumfwile umwela ulepukunya amabula. Nalishibe tawalepupa pa ncende ili yonse. Camoneke ukuba inshita ya cungulo iyatekanya. Nalitampwile ukufuma ku cimuti kabili namwene ukuti incende ukulingana na kamupaipi kamoneke ukulapupa ukupukunya mu mabula ya cimuti. Elyo kulya kwafumine ishiwi lyatile: “Wikanwapo, ukupeepa, atemwa ukubifya umubili obe mu nshila ili yonse, pantu ninkwata umulimo uwakuti iwe ukabombe nga waisaba umukalamba.”

Calimpele umwenso sana, icakuti nalibutwike ukuya ku ng'anda lelo nshaebele nangu umo pali cilya. Tekuti nwe atemwa ukupeepa. Ndecetekela Lesa ali no kubomba umulimo uukalamba mu nshiku sha kulekelesha.

Ilyo naishile kula ukulaenda ne bumba lya baice, balenseka no kusosa ukutila nali umwanakashi pakukana peepa atemwa ukunwa. Balesosa ukutila nangu banakashi kuti bapeepa kabili bali abashipa sana ukucila ifyo nali. Naleumfwa insoni lilya ukubeba ica citike mubumi bwandi. Lelo, mwe fibusa, icine cine ndepokelela ubukata nombamba pamulandu wa kweba icalo ilelo pali cena. Hallelujah!

Ukufika mupepi ne myaka yakufyalwa ikumi limo na ine nalicenekwe icabipisha munshita ya kulunga. Naliikele imyeshi cine lubali mu cipatala. Lesa alimombe lelo nshaumfwile.

Ubwite bwaishileba ubutuntulu sana-sana kuli ine. Lelo pa kukana kushiwa mu ng'anda ya bwina Kritu nalyeshe ukubukana. Inshita ishingi nalelyumfwa lilya, ishiwi ilinono ukulanjita, lelo nalelikana. Naishileba mu musango uwakuti teti njiminine na mukumfwa ishiwi ulukuta ukulumbulwa.

Ubushiku bumo natontonkenye ukuti ninsanga inshila iya kufumyapo bulya bwite. Nali no kuya kumasamba mukuyabomba pa famu ya ng'ombe. Cibusa, Lesa aba fye umukalamba kulya nge fyo aba pa ncende yonse. Shi winganonkelamo mufyo napitilemo. Nga Akwita iwe, Mwasuke.

Ubushiku bumo mu September ulucelo mu mwaka wa 1927, naebele bamayo nali nokuya pabulendo bwa kwikala mu mpanga ku Tunnel Mill, uko ukwaba nalimo ama mailoshi ikumi na yane-ukufuma ku Jeffersonville kuntu twaleikala pali ilya nshita. Nali pangile kale ubulendo ukuya ku Arizona ne fibusa fimo. Ilyo bamayo baumfwile ukufuma kuli ine nakabili, nshali ku Tunnel Mill lelo mu Phoenix, Arizona, ukubutuka ukufuma kuli Lesa wa Citemwiko. Ubumi bwapa famu ya ng'ombe bwali ubusuma sana pa kashita, lelo tapaposele inshita bwaishile kota, nge fyo caba pakwangala ukuli konse ukwa mu calo. Lelo lekeni insose pano, Lesa Alumbanishiwe, ukutila ukwishibana na Yesu kulawamining no kuwaminako fye inshita fye yonse kabili takukota. Yesu alapela umutende uwapwililila, kabili no kumfwa bwino lyonse.

Inshita ishingi ndomfwa umwela ulepupa ukupita mu fimuti ifitali fya pine. Calemoneka kwati kuti naumfwa ishiwi Lyakwe lileita mulya mukati ka mpanga, liletila, "Adam, uli kwi?" Intanda shalemoneka ukuba mupepi sana kuti washikata na maboko yobe. Lesa amoneke ukuba mupepi sana.

Icintu cimo icamoneke ukuba icituntulu sana kuli ine nombamba pali cilya calo cali misebo mu matololo. Nga wafuma fye mu musebo, uli no kuluba mumusango uwayanguka. Inshita ishingi abatandashi balamona utumaluba tunono utwa mumatololo kabili balapatuka mu nshila ku kuya tusenda.

Balalulumba mulya mu matololo kabili balaluba kabili inshita shimo balafwa ku cilaka. Efyo caba na munshila ya Bwinakristu-Lesa alikwata inshila. Alilanda pali yene muli Esaya, icipandwa 35. Litwa “Inshila ya Mushilo.” Inshita ishingiri utumangalo utunono utwa mucalo tulamufumya ukufuma mu nshila. Ninshi mwalufya ukwishibana kwenu na Lesa. Mumatololo lintu mwaluba, mulya limo mulamoneka umwengelele. Ku bantu abalefwa ku cilaka, umwengelele ulaba umumana atemwa bemba. Inshita ishingiri abantu balabutukilako no kuwilamo elyo kwisa sanga fye ukutila balesamba fye mu micanga iyakaba. Inshita imo Ciwa alamulanga icintu cimo ico asosa ukutila ninshita iisuma. Cilya mwengelele fye, cintu cimo icishaba icituntulu. Nga wakutika ukaisanga we mwine ukuitulikila fye amalanda pa mutwe obe. Wiesha ukumumfwila, we kabelenga. Cetekela Yesu uyo upela amenshi ya mweo kuli abo abomfwa nsala ne cilaka.

Ubushiku bumo napokelele inkalata ukufuma ku ng’anda ukunjeba ukutila umo uwa muli ba munyinane mulwele sana.

Cali ni Edward, uyo uwankonkele panuma. Nakaendi nshaposeleko amano sana, eico naceteketele ukuti ali nokuba bwino. Lelo cungulo bushiku bumo inshiku shinono shakonkelepo ilyo nalefuma mu musumba lintu napitile mu cikulwa cakulilamo pa famu namwene ipepala pa tebulo. Nalilibulile. Lyabelengelwe, “Bill, wise kuno ku mulemfwe kulwa ku kuboko kwa kulyo. Icikankala sana.” Panuma ilyo nabelengele kakalata umunandi naine twaendele ukuya ku mulemfwe. Umuntu wakubalilapo nakumenye ali umukote Lone Star kapenda wa nama uwalebomba pa famu. Ishina lyakwe ali ni Durfy, lelo twalemwita “Pop.” Akwete imimonekele ya bulanda pa menso yakwe ilyo alesosa ati, “mulumendo Billie, ninkwata imbila ya bulanda kuli iwe.” Pali ilye nshita kapitao aishile aleenda. Banjebele ukuti telegram elyo yaishile fye ukulanda pa mfwa ya kwa munyina.

We munandi, pakashita nali-fililwe ukwenda. Cali ni mfwa yakubalilapo mu lupwa lwesu. Lelo ndefwaya ukusosa kuti icintu icakubalilapo ico natontonkenye nga cakutila ali uwaiteyanya ukufwa. Ilyo napilibwike no kulolesha ukuciluka iciswebebe ica mutuntula, ifilamba fyakunkulukile mu masaya yandi. Ifyo naibukishe ifyo twalecula capamo ilyo twali abana banono kabili ifyo cali icakosa kuli ifwe.

Twaleya ku sukulu ukwabulo ukukwata icakulya icalinga. Utukondo twalikunse kansapato shesu kabili twalefwa ama koti ayakale ayafungililwa pa mukoshi pantu tatwalefwalako amashati. Ifyo naibukishe nacimbi ubushiku bumo bamayo babikile inyanje ishasalulwa mu kabeketi akanono ukuba icakulya cesu cakasuba. Tatwalelya na bonse abaice. Twalefilwa ukukwata icakulya ngeco balekwata. Lyonse twaleya mukufisama ku lupili no kulya. Ndeibukisha bulya bushiku twakwete inyanje ishasalulwa twatontonkenye cali ukusungwa bwino nganshi. Eico ukushininkisha nabulilepo umulingo wandi pali shena naile kulya ilyo tacilati cibe cungulo, nabulilepo ukwisusha ulupi lintu munyina talasenda umulingo wakwe.

Elyo ukwiminina palya pa ciswebebe icauma ku kasuba natontonkenye pali fyonse filya fintu no kusunguka nga cakuti Lesa ali musenda ku cifulo icisuma. Elyo nakabili Lesa ali njitile, lelo nga lyonse naeseshe ukucikanya.

Naliipekenye ukuya ku mushi ku cililo. Ilyo Rev. Mckinny uwa ku Port Fulton Church, umuntu uwaba kwati ni tata kuli ine, ashimikile icililo cakwe alilandile ukuti “Kuti kwabapo bamo pano abashaishiba Lesa, nga nifyo, mu musubile nomba.”

Owe ifyo naikatishe icipuna candi, Lesa alemombela nakabili. We kabelanga, nga aita, mwasuke.

Nshakatale ukulaba ifyo Batata abakote abapina na Bamayo balilile panuma ya cililo. Nalefwaya ukubwekelamo ku Masamba lelo bamayo balinombele na maka sana ku kwikala

icakutila pa mpela nalisumine ukwikala nga cakuti nasanga incito. Bwangu bwangu naliingile incito ku Company ka Public Service ka mu Indiana, umo momba nombamba.

Panuma ya myaka ibili lintu naleesha ama meters mwituka lya ba meter ku Gas Works mu New Albany nalicimfiwe no mwela uubi kabili pa milungu naliculile ukufuma kuli cilya. Naile kuli ba shing'anga bonse naishibe. Tekuti mpokeleleko no bwafwilisho. Naliculile na mumala umwakukantuka, umwelengele ukufuma ku mibombele ya mwela uubi. Caile cilebipilako inshita fye yonse. Bantwele kuli ba shing'anga mu Louisville, Ky. Mukulekelesha batile cali kabula mumala kabili batile ukuti nalingile ukutumbulwa. Tekuti nceicetekele, pantu nshatalile nkwatapo ubukali mumala yandi. Ba shing'anga batile tapali ico bengacita pali ine mpaka ilyo natumbwilwe. Mukulekelesha nalisumine ukuti bacite ici lelo nalikonkomeshe ukuti babomfye imibombele yabulo ukusendamika utulo pakuti ninga monako imitumbwile.

Owe, nalefwaya umuntu umo uwakwiminina mupepi na ine uyo uwaishiba Lesa. Nacetekele mwipepo lelo tekuti mpepe. Eico kapyunga ukufuma ku First Baptist Church aile naine mu cipinda cakutumbwilamo.

Ilyo bansendele ukufuma petebulo ukuya pa busanshi bwandi nalyumfwile nemwine naleya ndenaka no kulanaka inshita fye yonse. Umutima wandi kwati tawaletunta. Naumfwile kwati Nalafwa. Umupu wandi walecepelako fye lyonse. Nalishibe nalifikile pa mpela ya musebo wandi. We munandi lolala mpaka ukafike palya inshita imo elyo ukatontonkanya ifintu ifingi ifyo wacita. Nalishibe nshatalile mpeepa, ukunwa Atemwa ukukwata imisango ili yonse iyakowela lelo nalishibe nshali uwaiteyanya uku kumanya Lesa wandi.

We munandi, nga cakutila wabafye membala wa lukuta uwatalalilwa ushapilibulwa ukeshiba ilyo ukafika ku mpela ukuti tawaipékanya. Eico ico nga eco waishiba fye pali Lesa wandi, ndekwipusha pano pene ukufukama panshi pa makufi

yobe kabili ulombe Yesu ukukupela kulya ukwishiba pa ku Fyalwa libili, nga filya Aebele Nikodemo pamo muli Yohane, icipandwa 3. kabili owe ifyo inyenjele sha nsansa shili nokulila-Ishina Lyakwe Lilumbanishiwe.

Mwatendeke ukulafita mu cipinda ca mucipatala kwati fye nifilya ciba mu mitengo ikalamba. Naleumfwa umwela ulepupa ukupita mumabulalelo camoneke kwati kutali sana kulya mu mpanga. Limbi mwalyumfwapo ukuputa kwa mwela kulepukunya amabula, kuleisa mupepi kabili mupepi-kuli imwe.

Natontonkenye, “Cisuma, iyi nimfwa yaisa mukusenda.” Owe! Umweo wandi wali nokuya kumanya Lesa, naeshehe ukupepa lelo nalifililwe.

Umwela waishile mupepi, ukumfwika sana kabili sana. Amabula yalipangile icongo kabili pa nshita fye imo naliile.

Camoneke nomba ukuti nalibwekele nakabili umulumendo umunono uwabule nsapato ku nkasa, ninjiminina mulya mu mupaka mwisamba lya cimuti cimo cine. Naumfwile ishiwi limo line ilyo ilyatile, “Wikatala ukunwa atemwa ukupeepa.” Kabili na mabula naumfwile yali yamo yene ayapunkenye muli cilya cimuti bulya bushiku.

Lelo iyi nshita ishiwi lyatile, “Nali kwitile kabili tawaile.” Lyalibwekeshepo imiku itatu.

Elyo natile, “Shikulu, nga cakuti uyo ni mwe, lekeni mbwekelemo pe sonde kabili nkashimikila Imbila nsuma ukufuma pamulu wa mayanda na mufifutu fya misebo. Nkeba uuli onse pali yena!”

Ilyo ici cimonwa capwile, nasangile, ukuti nshatalile ukumfwa bwino. Shing’anga wandi uwakuntumbula ali acili mu cikulwa. Aliishile no kulolesha pali ine kabili ali papile. Alemoneka kwati aletontokanya kuti nafwa, elyo atile, “Nshaba umuntu uya ku calichi, ifyo naishiba fikalamba sana, lelo ninjishiba Lesa natandalila uyu mulumendo.” Umulandu

asosele filya, nshaishibe. Tapali nangu umo uwasoselepo icili conse pali cena. Nga cakuti Nalishibe lilya ifyo naishiba nomba, nga nalibukile ukufuma pali bulya bisanshi nokupunda Amalumbo kwi Shina Lyakwe.

Panuma ya nshiku ishinono balinsuminishe ukubwelela ku ng'anda lelo nali fye uwalwala kabili napatikishiwe ukufwala amaglass pa menso yandi pa mulandu wa astigmatism. Umutwe wandi waletenkana nga nalolesha pa cintu icili conse panshita.

Natendeke ukuya mukufwaya no kusanga Lesa. Naile ukufuma mu lukuta no lukuta ukweshwa ukusanga incende imo uko kwaba ubwite bwa ku cipailo ubwa musango wakale. Ulubali lwabulanda lwakutula nshasangilepo nangu kumo. Natile nga cakutula nali Umwinakristu, cine cine kuti naba umo. Kapyunga uwangu'umfwile ukulanda filya atile, "Nomba we mulumendo Billy, uleya mulya mu Cimfulunganya." Natile ukuti nga cakutula nkakwatapo bukapepa ndefwaya nkabumfwe ilyo bwaisa nga filya fine abasambi bacitile.

Owe ishina Lyakwe lilumbanishiwe. Napokelele bukapepa umwaleya nshiku kabili ncili nali bukwata, kabili ukupitila mukwafwilisha kwakwe nakulabusunga lyonse.

Inshita imo ubushiku naishilekwata sana insala yakuli Lesa kabili ukwishiba ukutuntulu icakuti naiile kulya ku cikulwa cakale kunuma ya ng'anda no kwesha ukupepa. Nshaishibe ifya kupepa lilya eico natendeke ukulanda kuli Wene nge fyo ningalanda kuli onse. Panshita ilya ine mwaishile ulubuuto mu cikulwa kabili lwapangile icapindama kabili ne shiwi ukufuma pa capindama lyalelanda kuli ine mu citundu ico nafililwe ukumfwa. Elyo lwaishileya. Nali fililwe ukulanda. Ilyo naishileba mubutuntulu, nakabili nalipepele, "Shikulu nga cakuti ulya nimwe, napapata iseni mulande kuli ine nakabili." Nalebelenga Baibele yandi ukutula ilyo nali pa ng'anda ukufuma ku cipatala kabili nalibelengele muli Yohane 4, "Mwe batemwikwa mwicetekela impashi yonse, lelo esheni mipashi mwishibe nga yafuma kuli Lesa."

Naliishibe ukuti umupashi walimonekele kuli ine, kabili ilyo nalepepa wali moneke nakabili. Elyo camoneke kuli ine ukuti kwalipo amapound ikana ayafumishiwe ukufuma mu mweo wandi. Nalitolweke no kubutukila ku ng’anda kabili namoneke kwati nalebutuka mu mwela.

Bamayo baliipwishe, “Bill, cinshi icacitika kuli iwe?” Nalyaswike, “Nshishibe lelo mucine ndeumfwa bwino kabili uwayanguka.” Tekuti njikale mu ng’anda nakabili. Nalifumine panse no kubutuka.

Naliishibe lilya ukuti nga cakutila Lesa alefwaya ine ukushimikila ali no kumposha, eico naile ku lukuta ulwatetekele mukusuba mafuta kabili nali poshiwe apopene. Nalimwene lilya ukuti abasambi balikwete icintu cimo ico bakapyunga abengi tabakwata ilelo. Abasambi balibatishiwe na Mupashi wa Mushilo kabili eico kuti baundapa abalwele no kucita ifipeshama amano ifingi mwi shina Lyakwe. Eico natendeke ukulapepela pa lubatisho lwa Mupashi wa Mushilo kabili naliupokelele.

Ubushiku bumo nalimo panuma ya myeshi mutanda iyakonkelepo, Lesa alimpele ukukabila kwa mutima wandi. Alandile kuli ine mu lubuuto ulukalamba ukunjeba ukuya mu kushimikila kabili no kupepela abalwele kabili Ali no kubaposha temulandu ubulwele ubo bakwete. Natendeke ukulashimikila kabili nokulacita ifyo Anjebele ukucita. Owe wemunandi, tekuti ntendeke ukukweba ifyo fyonse ifyacitika: amenso ayapofula ukwisulwa. Abalemana balyendele, impwalonda shalyundepwe ne fipeshamano ifya misango misango fyalicitilwe.

Ubushiku bumo mumbali ya Spring Street, Jeffersonville, Indiana, panuma yakupuputulwa kwa milungu ibili, nalebatisha abantu 130. Bwali ubushiku ubwakaba ubwa August kabili pali mupepi abantu amakana yatatu abalipo. Nali mupepi nokubatisha umuntu uwalenga 17 ilyo apopene fye naumfwile lilya nakabili, ishiwi ilinono nakabili kabili lyatile,

“Lolekesha mu mulu.” Ulwelele lwali kwati butale pali bulya bushiku ubwakaba ubwa August. Tatwatalile ukukwatapo imfula mupepi ne milungu itatu. Nalyumfwile ishiwi nakabili, nakabili umuku wacitatu lyatile, “Lolekesha mu mulu.”

Nalilolekeshe mu mulu kabili kulya kwaishile ukufuma mulwelele ulutanda ulwabalika ulukalamba ulo namwenepo inshita ishingiki kale lelo nshatala ukumwebapo pali lwena. Inshita ishingiki nalyebapo abantu pali lwena ukumonekela kabili bena kuti baseka fye nokutila, “Bill, uleelenganya fye cilya. Atemwa limbi walelota.” Lelo Lesa alumbanishiwe, iyi nshita Aliilangishe Umwine eka kuli bonse pambilibili, pantu lwaishile mupepi sana kuli ine nalifililwe no kuti nande. Panuma ilyo papitile akashita akanono, nalipundile kabili nabantu abengi balilolekeshe mu mulu no kumona ulutanda pamulu fye wandi. Bamo balinenwike elyo bamo balipundile kabili bamo balibutwike. Elyo ulutanda lwali bwelelemo mulwelele, kabili ne ncende apo lwafumine lwali mupepi mubutali ama feet ikumi limo nafisano, kabili iyi ncende yatwalilile ukulaenda no kulafundauka palya atemwa kwati fye amabimbi yale kunkuluka. Mwali pangile muli iyi ncende akalikumbi akanono akabuta, kabili ulutanda lwali pokelelwe mulya muli aka kalikumbi kanono.

Kuli kabelenga, nga cakuti fye nalikwete incende muli ili buku ukukweba ifintu ifingi ifyo ifya citika, ifyo tabernacle yesu yakulilwe, no kupuputulwa ukwingi ukwa maka uko twakwetepo. Abantu bafuma ukutali kabili na mupepi ku kuposhiwa. Lelo ndinokupanga ili buku linono ilyalinga pakutila lingashitishiwa pa mutengo unono no kufika kuli onse. Ifi fintu fyakumwishibisha ukuti Yesu Kristu acili fye cimo cine nge fyo ali mailo kabili ne lelo kabili ali nokuba umuyayaya, kabili ukutila mwingamucetekela no kupusushiwa. Nga kuti mwafwaya, panshita ili yonse ukupuputulwa kwesu kwaba mupepi naimwe, napapata kalonganeniko.

AMABUNTE

Nomba pamabula ayalekonkapo mwalasanga amabunte aya Umo umo pali abo abanono abaposhiwe munshita imo iyakulongana kwesu.

Nali mu cipat-ala mu New Albany, Ind. lintu naumfwile pali Munyina Branham. Nalipunkilwe na motoka. Mucituntulu imbafu shandi shonse shali kontweke. Inuma yandi ukonaika. Nali umulwele uwapwa, ukulingana no bwafwilisho bwa cipatala.

Munyina Branham ali mpepele, kabili ilyo line imbafu shandi shalibwekelemo mu cifulo cashiko, kabili ne numa yandi nayo. Shing'anga alifililwe ukwiluka ici. Naliminine, ukufwala ifyakufwala fyandi, naile na ku ng'anda, naile na ku ncito.

Lesu Alumbanishiwe pa Maka Yakwe Ayakuposha.

William H. Merrill, 1034 Clark St., New Albany Ind.

Nali icilema pa myaka iingi. Nalelala fye pa busanshi pa nshita imo. Imbafu shandi shalitintilwe eico nshaleenda. Shing'anga atile nshakatale nyenda. Naumfwile pali Munyina Branham ne fyo Lesu aleyasuka amapepo yakwe. Eico nalimwitile. Ena no mulumendo umbi uwainikwe, DeArk, balishile no ku mpepela. Apo pene imbafu shandi shaliposhiwe. Natendeke ukwenda. Ncili ndeenda. Papita imyaka 4 ukutula apo cacitikile.

Ndelumbanya Lesu pa Maka Yakwe a Yasuma.

Mrs. Mary Der Ohanion, 2223 E. Oka St., New Albany, Ind.

Kuli uyo Cingakumako,

Nali umulwele pa kashita. Imbafu shandi shali kontweke kabili nshali no kwenda nakabili. Ukulingana no bulondoloshi bwakwa shing'anga. Umwana wandi umwaume alinkunkulwishe ukuya ku kulongana kwakwa Munyina Bill, mu cicinga candi. Lilya mu nshita ya bushiku namwene umuntu ushaeendelepo pa myaka 18. Kabili nalimwene nakabili umuntu apokelele ukumona kwakwe no kwenda mukati ka lukuta ukwabulo ubwafwilisho ubuli bonse. Ali uwapofula pa myaka 40 na bambi abengi, ifilema na malwele yalekana lekana yalyundepwe lilya mu bushiku. Eico lintu yafikile inshita yandi ukupepelelwa, nalikwete icicetekelo ukutetekela muli Yesu, ukutula ali cimo cine mailo, ne lelo no muyayaya. Munyina Bill alimpepelele, alinjikete pakuboko kabili atile, "Mwi shina lya kwa Yesu-enda."

Naumfwile amaka yakwa Lesa ukwisa pali ine. Imbafu shandi ishakambatile ishalambalala pantanshi fye yandi shaile panshi kabili natendeke ukwenda, no kulumbanya Lesa, nalishile icipuna candi icakale no kwenda ukuya ku ng'anda ukuciluka imidada iingi iyamumusumba.

Mrs. T. Hargrove, 149 Spring St., Jeffersonville, Indiana

Balindekeleko imyaka ibili iyapitapo ukufwa ku mpwalonda. Nalimishibe Munyina Bill pa myaka. Nalimwishibe ukuba umuntu wakaele kabili nalisangwamo mukulongana kwakwe ukwingi. Lesa ukumupala no kubomba ifingi sana ifipsha amano ukupitila muli wene. Nali mwitile kuku mpepela. Impwalonda yandi yaliile.

Ncili uwansansa, ukulumbanya no kutotela Lesa.

Mrs. L. Stinner, Missouri Ave., Jeffersonville, Indiana

Balindekeleko kuli shing'anga wesu wapalupwa, insa fye shinono shakuba no bumi. Nalilwele mupepi ne myaka itatu ku mpwalonda.

Umuntu uweshina Iya Wiseheart anjebele pali Munyina Bill. Baendele na motoka imilundu amakumi yatatu na yasano ukupita mu menshi makasa na ice ukwisa kuli ine. Pa nshita ilya balefika kulya, impendwa ya banandi na balupwa balilongene capamo ukumona panshita yabo yakulekelesha. Abana bandi abakashana balishitile ifyakufwala fyandi ifya mu nshinshi ifyakushikwa nafyo. Nali fye mupepi nokuleko mweo ilyo Munyina Bill afikile kulya. Aliipwishe bonse abashacetekela ukufumamo mu cipinda. Elyo alifukeme kabili ali mpepelele. Naumfwile amaka yakwa Lesa pali ine lintu abikile ulupi lwakwe palwandi, kabili umuku fye umo naumfwile mpwalonda yandi yalipwile.

Naiminine pa nkasa shandi ukulumbanya Lesa pa maka yakwe. Ici cali imyaka 4 iyapitapo kabili nshatala nkwatapo mpwalonda ukutula lilya.

Lesu Alumbanishiwe pa Busuma Bwakwe.

Mrs. Sarah Hoyse, Middletown. Ind.

Nali icilema ukufuma ku kufyalwa. Tekuti nyende atemwa ukubomfya indupi shandi na maboko. Nalyumfwile uko Munyina Bill akwete ukulongana kwa kundapa ukusuma. Nalisangilweko no kumona ifintu ifyawama ukucitika mu cicetekelo mwi shina lyakwa Yesu kabili no kubikwa kwa ndupi.

Munyina Bill alimpepelele, elyo aloleshe fye ukutonta pali ine kabili atile, “Mwi Shina lyakwa Yesu, enda.” Naumfwile amaka yakwa Lesa ukwisa pa mubili wandi. Nalyumfwilile, kabili inshita iyakubalilapo mu bumi natendeke ukwenda. Nali ne myaka yakufyalwa 35.

Lesu muli shino inshiku shakulekelesha alecita ifintu ifisuma.

Ishina Lyakwe lilumbanishiwe umuyayaya.

Umwana wesu umunono umukashana, Betty, alelwala pa myeshi itatu. Twakwete bashing'anga babili abashibikwa bwino ba mu musumba, lelo camoneke, tekuti basange icalengele. Kabili twalikwete na bakapyunga abengi ba mu musumba no kushinguluka icalo ku kumupepelelako. Alitwalilile ukuba bubu. Elyo twatumine ku Jeffersonville, Ind., ku muntu uwe shina lyakwa Rev. Wm. Branham, uyo uwakwete icabupe ca kuposha kwa Bulesa. Munyina Bill, nge fyo etwa, alishile kuli ifwe inshita iyo ine. Panuma ya nsa ya mapepo, aliishile no kutweba ukuti Shikulu namulanga icimonwa ifyo ali nokucita pali Betty wesu umunono. Ali fye inkanda yeka na mafupa kabili aletutuma lyonse kwati alikwete ulukanko. Munyina Bill alitwipwishe nga twali nokucetekela Lesa kabili nga kuti twaumfwila ifyo Asoa ukucita. Panuma ilyo apepele nokwita pali wene ishina lyakwa Yesu, umukashana wesu umunono ali poshiwe ilyo line. Ico cali nalimo imyeshi ikumi limo iyapitapo. Betty wesu umunono ali nombamba mubumi ubwapwililika kabili aba uwaina nge fyo engaba. Ndi no kusansamuka ukulembela uuli onse utwishika pa kundapwa kwakwe, atemwa ukuposha ukuli konse uko ukwacitike munshita yakupuputulwa uko Munyina Branham akwete mu St. Louis mu 1945.

Ukuposha ukwacitike Mukupuputulwa kwa mu St. Louis kusangwa mwibuku ilitwa "Icimonwa ca Mulu," na Munyina Branham. Beni abashininkisha ku kulibelenga.

Rev. Robert Daugherty, 2009 Gano Ave. St. Louis, Mo.

KULI ONSE CINGAKUMAKO:

Nali pa busanshi ubuseneme pa myaka cine konse konse ne myeshi pabula kuli T.B. kabili bashing'anga balindekeleko. Nshalefina nama pound amakumi yasano kabili camoneke kwati isubilo lyonse lyalile. Elyo ukufuma ku Jeffersonville, Ind., mupepi ne milundu amakumi yatatu na yasano ukufuma pa ng'anda yesu, kwaishile Rev. Wm. Branham, mu cimonwa

ico amwene ca mwana wa mpanga uwaiketwe mu ciswebebe kabili alelila “Milltown” (Kulya eko njikala.) Munyina Branham tatalile ukubapo kuno atemwa ukwishibako uuli onse ukufuma kuno. Kwisaingila, abakile indupi shakwe pali ine no kupepa, ukwiita pali ine ishina lya mutemwikwa wesu Shikulu Yesu. Icintu cimo camoneke ukunjikata kabili pamuku umo nalibukile no kulatasha Lesa pa maka Yakwe ayakuposha. Nalifumine panse mukwenda umuku wandi uwakubalilapo mu myaka cine konse konse, elyo nalibatishiwe mu mumana, mwi shina lya kwa Yesu Kristu. Nomba naba kalisha wa piano pa Baptist church kuno. Kwali nafimbi ifingi ifjaatike noku kundapa ukukalamba. Nshikwete incende muli ubu bunte kukubulemba bonse. Nkalemba ne nsansa no kweba mu butuntulu kuli onse ulefwaya kwishiba mu kuposhiwa kwandi.

Georgia Carter, Milltown, Indiana.

KULI ONSE CINGAKUMAKO:

Nalitumbwilwe kabili nalikwete icintu campwalonda ukufuma mu kutumbulwa. Nalicitile fyonse ifyo naishiba ifya kucita ku kubwekeshapo ubumi bwandi, lelo nalifililwe. Umukashi wandi nao ali umulwele kabili twalyumfwilepo pali Rev. Branham kabili ifyo Lesa alebomba ukupitila muli wene mu kuposha abalwele. Twaile ku ng’anda yakwe pa bushiku bumo bwa pa Mulungu mu cungulo nalimo imyeshi mutanda iyapitapo, kabili ilyo twafikile twasangile nabambi kulya pa mulandu umo wine, kabili baleposhiwa. Elyo twalikwete ukulanshanya na Munyina Branham kabili twalimwipwishe nga cakuti icili conse kuti cacitwa pali ifwe. Twali mwebele twali Bakatolika lelo alitwebele ukutila ukundapwa kwa Bulesa kwali kwa kupelwa kuli onse uwingacetekela. Atulangishe pa mukashana wa ku Katolika uyo uwapokelele ukumona kwakwe pantu ali ipwishe Lesa ku kumwafwilisha, kabili nomba alabelenga ifilembo ifinono bwino. Ali uwapofula sana icakutila aletungululwa fye ku ng’anda yakwe.

Elyo umukashi wandi pamo naine twalipepelelwe kabili ifwe bonse babili twaliposhiwe. Mpwalonda yandi yalifuminepo! Twaliba nombamba abansansa sana no bumi busuma kabili cila lucelo ndashibuka pa busanshi no kupepela Munyina Branham no mulimo wakwe kuli Lesa insa shitatu. Nalikwata amakwebo ya fya malaiti muno mu musumba kabili cila nshita ya lucelo pa Mulungu tulaya ku minsa yakubalilapo kabili elyo tulaya bwangu bwangu ukuciluka ubulalo kulya ku Branham Tabernacle. Kabili tulasangwako mu kulongana kwa mu bushiku na kumapepo ya nshita ya bushiku pali Citatu. Tulekwata inshita iisuma kabili cilemoneka kwati tuleikala mucalo cipya. Ndi no kwasuka ne nsansa inkalata ili yonse pe lyashi lya ku poshiwa kwandi.

Louis H. Head, 417 Garnet Court, Louisville, Ky.

Ndefwaya ukulundapo ubunte bwandi ku bukata bwakwa Lesa pamulandu wa kundapa kwa Bulesa. Pa myaka nalimo itatu nalecushiwa kuli eczema, ubwatwalilile ukusalangana no kulabipilako fye, mpaka kunuma ya ndupi shandi na pa mulu wa nkasa shandi fyali inkanda iyauma. Fyali ifyafimba ububi sana kabili fyalekalipa sana. Pa April 11, 1945, Munyina Branham ali nsubile kabili abikile indupi shakwe pali ine mwipepo, lelo mucifulo cakuti mbe bwino, nalitwalilile ukumfwa ububi, kabili nge fyo nalebomfya amafuta pa ndupi shandi ne nkasa, natontonkenye ukuti uyu limbi ewali umulandu nshalepolela. Eico nalisalile ukuleka ukubomfya imiti yonse no kulekela umulandu onse kuli Shikulu. Pa June 10, Munyina Branham na Munyina Seward balimpepelele nakabili kabili Shikulu ali mposeshe, Lilumbanishiwe ishina Lyakwe ilya mushilo! Umuku umbi kale Munyina Branham alinsubile pamulandu wa fyakukalipwa. Amakasa yandi yalekalipa icakuti nalecushiwa pa kwenda. Lelo ukutula apo na subilwe, amakasa yandi yaishile kwata maka, kabili ilelo kuti naenda intafu ishitali no kukana umfwa ubukali sana ukucila

lilya cali fye ulutampulo lumo ilyo takulaba ukusubwa. Kabili ndefwaya ukulundako ukuti uku tekwishiba kwandi ukwa ntanshi pa kuposhiwa kwa Bulesa. Imyaka iyafumako amakumi yabili na umo, nalisangilweko ku kulongana ukwa citilwe na ba Rev. C.H. Erikson ku Columbus, Ind. Bamo baliposhiwe ku malwele ayalekena lekana kabili nge fyo naculile ukufuma ku cakuncusha icabipa ica fibubi pa nshita ntali kabili nalikwete icamenene pa linso lyandi ilya ku kulyo icakutila cafimbile ukumona kwandi ulubali lumo (kabili nga cali mpofwishe mu nshita), naine wine, nalilombele Shikulu ku kunenga ukuba bwino kabili Alicitile. Nshatalile nakabili ukucushiwa no bulwele bonse bubili. Nalipokelele ili palo pabwikele mu cipuna candi, pantu nshaipwishe amapepo yakwa Rev. Erikson. Nalimonako palwa kuposha kabili nalyumfwapo no kubelenga amabunte ya bantu bambi. Mupepi ne myaka ibili nalipitile pa ng'anda apapalama na Prospect, Ky. Akanono, akanya akalwele kalilele pa butanda mu lubansa kabili banyina balinjebele kali ne myeshi ukucila ine yakufyalwa kabili kali akalwele ubumi bwakako bonse ubunono. Kali akaonda sana kabili teti kasende icakulya ukwabulo kupunda ku bukali. Pa Mulungu uwakonkelepo nalyebele Munyina Branham pa mwana. Ena pamo no lukuta balipepele akanya, kabili imilungu inono iyakonkelepo nakabili nali pitile pali iyi ng'anda inono kwipusha pa kanya. Katendeke ukulaumfwa bwino no ku kwatilapo ukufina. Naliingilemo mukuya kamona, kabili kalelya icakulya no kucumfwa bwino sana. Calilembwa ukuti Shifwe uwa mulu alipela umwana Wakwe Yesu Kristu, amaka yonse mu mulu na pesonde, kabili ali Mupela ishina ilyapula ishina lyonse, na Petro atile ati cali ni mwishina Lyakwe, ukupitila mu cicetekelo mwi shina Lyakwe, umo umuntu uwalemana aposhiwe pa Mpongolo ya pe Tempile. Caba ni muli lilya ishina lya bukata ifintu ifi ifisuma filecitwa ilelo. Kabili ilyo twaposhiwa kwi pepo lya cicetekelo, ili tepalo lyeka fye tupokelela, lelo cilasenda pamo nalyo icishininkisho ca membu ukulekelelwa. James 5:15.

Tuletasha Lesa ukuti nakwata muli cino calo ica cushiwa ilelo, abaume nga Munyina Branham, Erikson, John Sproul na bambi abo Umupashi wapela icabupe ica kundapa kwa Bulesa. Yesu Kristu aba cimo cine mailo, ilelo no muyayaya. Kabili Aba fye uwa linga no kufwaya ukutuposha kwati lilya Ashimikile Imbila nsuma ya Bufumu no kuposha abantu pa myaka ikana limo ne myanda pabula iyapitapo. Nalimwene Joan Gray, akanya akanono akali akalwele, pa August 26. Nomba alicila ne myeshi yakufyalwa 27 kabili aliba bwino no bumi ubusuma nge fyo engaba.

Wenu muli Kristu Yesu,

G.W. Jones, 705 E. Maple St., Jeffersonville, Ind.

Ku banandi, kuli na bambi abo abaundapwa kabili kuti batemwa ukupela ubunte bwabo nga bakambone ku maka yakwa Lesa lelo tatukwete incende kuli yena, ino ine fye nshita muli ili buku ilinono. Aya mabunte ayo ayapelwa yaba ku kukoselesha imwe ukucetekela Yesu Kristu no kumwishiba ena nga Kapususha wenu kabili kondapa.

Abengi ababelenga Baibele, batila, “Nga cakutila naikele mu nshita sha Baibele, kuti naya kuli Yesu kabili kuti Angufwa.” We munandi, ali pano ilelo mu ku kwafwilisha, nga filya fine ali muli bulya bushiku. Cetekela fye Mupashi wa Mushilo, Ena ni Kambone wakwa Yesu. Napapata, apo pene fye muli, Mucetekeleni, kabili muli no kuposhiwa.

UKUSHIMIKILA

Isambililo lyesu lilesangwa muli Esaya, 53:5.

“Alashilwe pa fya bupulumushi fyesu, afwantilwe pa mampulu yesu. Ukulimuna ukwa kuti tumwenemo ubutuntulu kwaponene pali Wene na mu fipumo fyakwe twaliposhiwe.”

Nomba we munandi, Baibele yatila, “Na mufipumo fyakwe twaliposhiwe.” Kabili tulesumina tucili twalikwata ukulekelelwa kwa membu shesu ukupitila mukusumya kwa mulopa Wakwe, temulandu ifyo twacita. Cinshi? Pantu cali ni mu kukonsolwela, mulesosa. Bushe tacili ifipumo Fyakwe pa mulandu wa Kuposhiwa mu cakukonsolwela nako? Kanshi nga cakuti ica ku konsolwela pa kuposhiwa cali lufya amaka yaciko, ninshi muli mu membu shenu; pantu, ica ku konsolwela pa membu shenu fyapangilwe no Mulopa umu wine ukufuma ku muntu umu wine pa ncende imo ine, pa nshita imo ine, pa bushiku bumo bwine.

Kanshi muli no kusosa ukuti filabombela pamo atemwa tacakwata amaka.

Awe, we munandi, ucetekele Yesu umusango umu wine pa kuposhiwa kobe nge fyo ucita pa membu shobe, kabili ica kukonsolwela cikakwata amaka yamo yene. Cili no ku kubombela imbali yonse, ilyo wacetekela ukuti capangilwe iwe muli buno bashiku nge fyo cali nakuli balya nabo muli bulya bushiku.

Nga filya fine muya ku mumana ukuya mukwabuka pa cikwepe, mulemona bambi baleyabuka, inga imwe cinshi teti mwabukile? Tamuya kuli captain wa bulya bwato no kumwipusha nga cakutila ubwato bwalaya atemwa iyoo. Mulipila fye amalipilo yenu, mwaingila nokwikala. Cili nomba kuli kensha ku kumusenda ukumwabusha umumana.

Caba umusango umo wine ku ku Posha kwa Bulesa, mulemona bambi balelengwa ukuba bwino na imwe bene kuti mwaposhiwa. Kabiye ni fye kuli Yesu. Amalipilo muli uyu mulandu cicetekelo, elyo cili kuli Yesu ukumona ukuti mwapita.

Owe, munyina na nkashi, mucetekele Ena, naiwe wine kuti waposhiwa. Inshiku Shafipesha mano tashapita kuli abo abacetekela iyoo .

Cintu nshi icantanshi mucita ilyo mulepekanya ukuya mukutandala kunse ka mushi? Mulasenda ibuku lya bakashana bakale [almanac-Kel] no kumona bulya bushiku ifyo almanac ilelanda nga cakuti yakulaloka atemwa ukuba bwino. Elyo muli no kusangalala nga lyatila kuleba bwino. Elyo muli no kusosa, “Tuli no kupekanya mukuyatandala kunse ka mushi muli bulya bushiku.” Muli nokushita icakulya cenu conse icakasuba no kuiteyanya ku kuya pa cuti pamulandu fye wakutila almanac yatila “bwino.”

Owe, munyina na nkashi, mulabika cilye cicetekelo icafula muli almanac, cinshi teti mucetekele mu Cebo ca kwa Lesa? Ibukisheni Lesa lyonse alikwata abo abacetekela, cinshi teti ube umo uwa abo nombamba? Belenga Marko 16 kabili mumone ukuti ifunde ilyakulekelesha ilyapelwa ku lukuta lyali ukundapa abalwele. Atile “Kabili ne fishibilo ifi fikakonka abacetekela.”

Ngo lukuta lwenu lusosa ukuti bali cetekela kabili ne fishibilo tafikonka, ninshi ukulingana ne Cebo ca kwa Lesa tabacetekela.

Ipusheni umuntu umo ilelo pa cishibilo cisuma cawa cetekela kabili baka musontelela ku muntu umo uwaikala bwino mubwikashi. Umo ulipila ishingiri pa mbale ya musangulo. Owe we munandi, bamo pali bena tabaishiba nangu panono pali Lesa ifyo Hottentot aishiba pa nshita ya bushiku ya mu Egipto, kabili bamo pali bena balisambilila

bwino bwino ukufuma ku ma seminario nabo. Lelo taulingile ukuba uwasambilila ku kwishiba Lesa. Lelo ilingile ukucita ifingi ukucila abengi pali bena, mulingile ukucetekela kabili nga mwacita ifishibilo muli Marko 16:17-18 fikamukonka nge fyo Yesu asosele ukuti bakacita.

Ibukisheni muli Marko 16 yatila shimikileni Imbila nsuma ku cibumbwa conse. Kuti mwasosa, “Munyina Branham, inge Mbila nsuma cinshi, pakutila twingeshiba nga twali ikwata atemwa iyoo. Bushe yena Cebo?”

Paulo atile ukuti Imbila nsuma iisa kuli ifwe te mucebo ceka lelo mu Maka no kulangishiwa kwa Mupashi wa Mushilo. Kanshi bushe teti mukwate ukukwata Amaka ya Mupashi wa Mushilo ku kulangisha filya fishibilo ifya Marko 16?

Pilibuleni pamo naine muli 2 Timote, Icipandwa 3 kabili mumone ifyo Umupashi wa Mushilo usosa ukuti mu nshiku shakulekelesha abantu bakakwata imimonekele yabukapepa lelo bali nokukana amaka yabuko, kabili ku bantu bamusango uyu Baibele yasosa kuli imwe ukutalukako.

Bushe ico tacili icishibilo icakuti twikala mu nshiku shakulekelesha? Abantu balakana amaka aya kuposha kabili no kuba abantungwa abene bene ukufuma ku membu.

Inkuta shileya shiletalala sana na thermometer ileya ukufuma pa sixty ukufika pa zero. Teti mukwate ukucimfya no kubomfya Ukuposha kwa Bulesa pamo na makadi ya malila na bafwaka. Abantu bamo baya ku calichi pa Mulungu ulucelo ne cimushanga icikulu mu kanwa kabo, ukumoneka kwati ni ng’ombe ilume iyaku Texas ifumishiwe ama sengo. Icebo citila ifwe tulingile ukuisangulula fwebene ku fyakukowela fyonse. Owe munyina, talukako ukufuma ku fintu fyobe fya mucalo no kubombela Lesa. Elyo akakusuminisha ukwenda mu nshila Yakwe ya Mushilo nge fyo Esaya Icipandwa 35 yalanda po.

Ngo muntu umo kuti amuletela cheque wa ndalama isha \$70,000.00 kuti mwatendeka ukusansamuka. Nga namwipusha

umulandu mubelele abansansa sana, kuti mwanjasuka ukuti na mukwata \$70,000.00. Nga nalitwishike ci kuti mwanangisha cheque wa ndalama. Nga nasosa ukuti cali fye iciputulwa ca cipepala na malembo peka kuti mwanjasuka bwangu bwangu ukuti kulingile kwabako \$70,000.00 iyabikwa no buteko bwa U.S. lintu cheque talalembwa kabili pamulandu waico ubuteko bwali no kusuminisha.

Mwishibe kanshi ukuti James 5:14 yasosa ukuti ipepo lya cicetekelo likapususha abalwele. Kuti mwasosa ukutila cilya cali fye icipepala ne fyalembwapo peka. Lelo munyina, ku Mulu konse kulasuminisha Baibele.

Ilyo mwabelenga Icebo Cakwe ibukisheni ubulayo bwaba kuli imwe. Kanshi tendekeni ukusansamuka no kucetekela kabili Ali no kumuposha.

Aba ni Lesa umo wine ilelo no muyayaya. Ameni.

Lyalembelwe mu Cingeleshi mu ma 1940.

Lyalembelwe nakabili mu 1991.

Lyalembelwe mu Cibemba mu 1995.

BEMBA

©1995 VGR, ALL RIGHTS RESERVED

VOICE OF GOD RECORDINGS

P.O. BOX 950, Jeffersonville, Indiana 47131 U.S.A.

www.branham.org

Icishibisho ukufuma ku mwine kalemba

Insambu shonse tashisuminishiwe. Ili buku kuti Iya lembwa pali pulinta yapa ng'anda ku kubomfya kwa muntu pa lwakwe nangu ukupela, ukwabula amalipilo, nge cipe caku sabankanya Imbila nsuma iya kwa Yesu Kristu. Ili buku tekuti lishitishiwe, ukulembululwamo ayengi, ukubikwa pa mwela, ukusungila muli ba mashini, ukwalula mu ndimi shimbi, nangu ukuli bomfya ku kulomba indalama ukwabula insambu shalembwa na ba Voice Of God Recordings®.

Nga mulefwaya ukwishibilapo nafimbi nangu ukufwaya na fimbi ifyabapo, twalomba tumeni kuli ba:

VOICE OF GOD RECORDINGS
P.O. BOX 950, JEFFERSONVILLE, INDIANA 47131 U.S.A.
www.branham.org